

Ням гарагийн өглөөний хуралдаан

Ерөнхий чуулган

Ням гарагийн өглөөний хуралдаан

2011 оны 4-р сарын 3

Илчлэлтийн сүнс

илчлэлт

Ариун Сүнс

Сүмийн түүх

дуулгавартай байдал

итгэл

ерөнхий чуулган

Илчлэлтийн Сүнс

Арванхоёр Төлөөлөгчийн Чуулгын

Ахлагч Давид А.Беднар

Илчлэлтийн сүнс үнэн бодитой бөгөөд бидний амьдралд болон Сүмд үйл ажиллагаагаа явуулж чаддаг, явуулсаар ч байгаа билээ.

Миний хэлэх үгийн дараа дуулах “Би ямар нэгэн сайн юм хийсэн үү?” (*Hymns*, no. 223) гэсэн сүнслэг нөлөө бүхий дууллыг сонгосонд талархал илэрхийлье. Би хэлэх үгэндээ энэ дууллын санааг ашигласан юм.

Бидний ихэнх нь мэддэг гэрэл гэгээтэй холбоотой доорх хоёр туршлагын талаар эргэцүүлэн бодохыг би та бүгдээс хүсч байна.

Эхний туршлага нь бид харанхуй өрөөнд орж, гэрэл асаахад тохиодог. Гэрлийн цацраг хэрхэн агшин зуур өрөөг гэрэлтүүлэн, түнэр харанхуйг арилган үгүй болгодгийг санаж байгаа биз дээ? Өмнө нь харагдахгүй, тодорхой бус байсан зүйлс тодорч, танигдахаар болдог. Энэ туршлага нь гэрлийг тэр даруй, тодоор харахыг тодорхойлж байна.

Хоёр дахь туршлагыг бид үүр цайх агшинд мэдэрдэг. Тэнгэрийн хаяанд алгуур, үл мэдэгдэм гэрэл өсөн нэмэгддэгийг та нар санаж байна уу. Мандах нарны гэрэл нь харанхуй өрөөнд гэрэл асаахтай адил гэнэт үзэгддэггүй. Харин гэрэл нь алгуурхнаар тасралтгүй нэмэгдсээр, шөнийн харанхуй үүрийн гэгээгээр солигддог. Ийнхүү эцэст нь тэнгэрийн хаяанд наран манддаг. Гэвч нар мандах баталгаа нь тэнгэрийн хаяанд гарцаагүй үзэгдэхээс хэдэн цагийн өмнө тохиодог. Энэ туршлага гэрлийг нарийн, алгуур байдлаар тодорхойлон харуулсан байна.

Гэрэлтэй холбоотой энэхүү энгийн хоёр туршлагаас бид илчлэлтийн сүнсний тухай маш их зүйлийг сурч болно. Одоо илчлэлтийн сүнс болон илчлэлт хүлээн авах үндсэн загвар дээр анхаарлаа төвлөрүүлэхэд Ариун Сүнс бидэнд урам зориг өгч, чиглүүлэх болтугай хэмээн би залбирч байна.

Илчлэлтийн сүнс

Илчлэлт нь дэлхий дээрх хүүхдүүдтэйгээ харьцах Бурханы харилцаа холбоо төдийгүй, бэлэгтэй адилтгах агуу адислалуудын нэг ба Ариун Сүнсний байнгын нөхөрлөл юм. Бошиглогч Иосеф Смит “Ариун Сүнс бол илчлэгч” ба “ хэн ч илчлэлтүүдийг хүлээн авахгүйгээр Ариун Сүнсийг хүлээн авч чадахгүй” (*Teachings of Presidents of the Church: Joseph Smith* [2007], 132.) хэмээн заасан байдаг.

Илчлэлтийн сүнс нь зохистой санваарын эрх мэдлээр нүглүүдээс ангижрах усанд умбуулах баптисм ба толгой дээрх гар тавилтаар Ариун сүнсний бэлэг хүртэн авралын ёслолуудыг хүлээн авсан мөн санваарыг гүйцэтгэхээр “Ариун Сүнсийг хүлээн авах” тушаалыг итгэлтэйгээр үйлдэгч хүн бүрт ирэх боломжтой юм. Энэ адислал нь Сүмийн тэргүүлэх эрх мэдэлтнүүдэд өгөгддөг төдийгүй нандин гэрээнүүдэд орсон эрэгтэй, эмэгтэй, хариуцлагын насанд хүрсэн хүүхэд бүрт хамаатай бөгөөд тэдний амьдралд нь үйлчлэн нөлөөлөх ёстой. Чин сэтгэлийн үнэн хүсэл ба зохистой байдал нь илчлэлтийн сүнсийг бидний амьдралд буй болгодог.

Иосеф Смит, Оливер Каудери хоёр Мормоны Номыг орчуулж байхдаа илчлэлтийн сүнсний талаар үнэ цэнэтэй туршлагыг олж авчээ. Тэд үнэнч зүрх сэтгэлтэйгээр, хүлээн авна гэдэгтээ найдан, итгэлтэйгээр асуух аваас өөрсдийн ажлыг гүйцэтгэхэд шаардлагатай аливаа мэдлэгийг хүлээн авч болно гэдэгт суралцсан юм. Мөн хэсэг хугацааны дараа тэд илчлэлтийн сүнс нь Ариун Сүнсний хүчээр бидний оюун санаа, зүрх сэтгэлд ирдэг бодол болон мэдрэмжийн адил ердийн үйл явц гэдгийг улам сайн ойлгожээ (С ба Г 8:1–2; 100:5–8-ыг үз). Их Эзэн тэдэнд, “Эдүгээ, болгоогтун, энэ бол илчлэлтийн сүнс болой, болгоогтун, энэ бол Мосе Израилын хүүхдүүдийг Улаан Тэнгисийн дундуур хуурай газраар гаталган авчирсан тэр сүнс бөлгөө. Тиймийн тул энэ нь чиний бэлэг болой; үүнийг ашиглагтун”(С ба Г 8:3–4) хэмээн зааварлажээ.

Би илчлэлтийн сүнсэнд хамаатай “үүнийг ашиглагтун” гэсэн үгийг тодруулан үзэхийг хүсч байна. Судрууд дээр Ариун Сүнсний нөлөөг “намуухан дуу хоолой” (1 Нифай 17:45; Хаадын Дээд 19:12; мөн 3 Нифай 11:3-ыг үз), “төгс зөөлөн тайван дуу хоолой” (Хиламан 5:30) гэж дүрсэлсэн байдаг. Сүнс бидэнд намуухан, тайвнаар шивнэдэг учраас бид яагаад зохисгүй нэвтрүүлэг, порнограф болон хөнөөлтэй донтуулагч зүйлс ба донтуулах байдлаас зайлсхийх ёстойг ойлгоход хялбар юм. Дайсны эдгээр хэрэгслүүд Бурханы Сүнсний хүчээр илгээгдсэн түүний мэргэн захиасуудыг таньж мэдэн, хариулах чадварыг маань сулруулан доройтуулж улмаар устгаж ч болох юм. Хүн бүр чөтгөрийн өгөөшөөс татгалзаж, илчлэлтийн сүнсийг хувийн амьдрал ба гэр бүлдээ хэрхэн зөв шударгаар “ашиглах” талаар нухацтайгаар эргэцүүлж, залбиралтайгаар тунгаан бодох ёстой.

Илчлэлтийн хэв маягууд

Илчлэлтүүд нь зүүд, үзэгдэл, тэнгэрлэг элч нартай ярилцах, сүнслэг өдөөлт зэрэг олон янзын хэв маягаар дамжин ирдэг. Зарим илчлэлтийг шууд, хүчтэй хүлээн авдаг бол зарим нь алгуур, нарийн учир шалтгаантайгаар танигддаг. Миний ярьсан гэрлийн тухай хоёр туршлага илчлэлтийн үндсэн хоёр хэв маягийг илүү сайн ойлгоход бидэнд тусална.

Харанхуй өрөөнд гэрэл асаах нь Бурханаас ямар нэгэн захиас хурдан, бүрэн дүүрнээр, нэг дор хүлээн авахтай адил юм. Бидний олонх нь илчлэлтийн энэ хэв маягийг чин сэтгэлийн залбирлын хариултаар эсвэл Бурханы хүссэн цагт Түүний тааллын дагуу бидэнд шаардлагатай удирдамж буюу хамгаалалтаар хангагдах зэргээр мэдэрсэн. Ийм шууд, хүчтэй илчлэлтийн дүрслэлүүдийг судруудад мөн Сүмийн түүхэнд өгүүлсэн байдаг бөгөөд бидний амьдралд ч тохиолдсон байдаг. Үнэхээр ийм хүчит гайхамшгууд тохиодог билээ. Гэхдээ илчлэлтийн энэ хэв маяг нь тийм ч нийтлэг тохиолддоггүй.

Мандах нарны алгуур нэмэгдэх туяа нь Бурханаас “шат шатаар, дүрэм дүрмээр” (2 Нифай 28:30) өгөгдөх захиастай адил юм. Ихэнх тохиолдолд илчлэлт нь бага багаар бидний хүсэл, зохистой байдал, бэлтгэлийн дагуу ирдэг. Тэнгэрлэг Эцэгээс ирэх ийм харилцаа нь эцэстээ “тэнгэрээс буух шүүдэр лугаа адил [бидний сүнсэнд] намуухан буух болно” (С ба Г 121:45). Илчлэлтийн энэ хэв маяг нь Нифай Лебенээс гуулин ялтсуудыг амжилттай олж авахын өмнөх хэдэн удаагийн оролдлогод илэрдэг (1 Нифай 3–4-г үз). Хамгийн сүүлд нь “хийвэл зохих зүйлүүдийг [гэр] урьдаас мэдэхгүй” (1 Нифай 4:6) байсан ч Сүнсээр Иерусалим уруу хөтлөгдсөн. Нифай уран хийцтэй усан онгоц хэрхэн барихыг шууд нэг дор сураагүй ч Их Эзэн “усан онгоцны дүнг модыг ямар маягаар бэлтгэхийг цагаас цагт [түүнд] үзүүлж байсан бөлгөө” (1 Нифай 18:1).

Сүмийн түүх болон бидний хувийн амьдралд “шат шатаар, дүрэм дүрмээр” илчлэлт хүлээн авах Их Эзэний энэхүү хэв маягийн жишээ олон байдаг. Жишээлбэл, Бошиглогч Иосеф Смитэд сэргээгдсэн сайн мэдээний гол үнэнүүд Ариун төгөлд шууд нэг дор бүгд өгөгдөөгүй. Эдгээр үнэ цэнэтэй эрдэнэсүүд зөв цагт, нөхцөл байдал зохистой үед илчлэгдэж байсан.

Ерөнхийлөгч Жозеф Ф.Смит илчлэлтийн энэ хэв маяг түүний амьдралд хэрхэн ирснийг тайлбарласан байдаг.

“Би хөвгүүн байхдаа гэрчлэлтэй болохын тулд Их Эзэнээс зарим нэгэн гайхамшиг үзүүлэхийг байнга хүсдэг байлаа. Гэвч Их Эзэн надаас гайхамшигийг нууж, надад үнэнийг зулайнаасаа хөлийнхөө ул хүртэл, эргэлзээ ба айдсаасаа бүрэн чөлөөлөгдөх хүртэл, шат шатаар үзүүлсэн юм. Үүнийг хийлгэхийн тулд Тэр тэнгэрээс тэнгэр элчийг илгээгээгүй, бас Тэр бүрэн дуугаар ч яриагүй. Амьд Бурханы Сүнсний намуухан, тайван дуу хоолойгоор шивнэн, надад буй гэрчлэлийг Тэр өгсөн юм. Энэ зарчим ба хүчээр Тэр хүмүүний бүх хүүхдэд тэдэнд үлдэх үнэний тухай мэдлэгийг өгдөг бөгөөд энэхүү мэдлэг нь тэднийг Бурхантай адил мэдлэгтэй, Эцэгийн хүслийг Христийн адил гүйцэлдүүлэх чадлыг өгөх болно. Ямар ч өөр гайхамшигтай илэрхийлэл үүнийг хэзээ ч гүйцэлдүүлж чадахгүй.” (in Conference Report, 1900 оны 4-р сар, 40–41).

Сүмийн гишүүд бид гайхамшигтай, үр нөлөөтэй сүнслэг илэрхийлэлтийг онцгой чухалчлан, талархахаа мартаж, Ариун Сүнсээр гүйцэлдүүлэх түүний ажлын ердийн хэв маягийг анзааралгүй өнгөрөх хандлагатай байдаг. Хэсэг хугацааны дараа, эцэст нь хүссэн хариулт эсвэл бидэнд хэрэгтэй удирдамжийг бүрдүүлэн батлах, жижиг бөгөөд өсөн нэмэгдэх сүнслэг мэдрэмжийг хамгийн “энгийн байдал”-аар (1 Нифай 17:41) хүлээн авах нь биднийг “зорилгоос алсуур хайх” (Иаков 4:14) байдалд хүргэж мэднэ.

|Би тогтмол, гайхамшигтай эсвэл хүчтэй сэтгэгдлийг хүлээн аваагүйгээс хувийн гэрчлэлийн хүчиндээ эргэлзэж, сүнслэг байдлаа дутуу үнэлсэн олон хүнтэй ярилцаж байсан. Магадгүй бид Ариун төгөл дэх Иосефын, Дамаск орох зам дээрх Саулын мөн Залуу Алмагийн туршлагын талаар эргэцүүлэн бодоод эдгээр сайн мэдэх, сүнслэг сэтгэл догдлом жишээнүүдтэй ижил төстэй зүйл тохиогоогүйд өөрсдийгөө хэвийн биш эсвэл дутагдалтай гэж бодож эхэлсэн байж мэднэ. Хэрэв та нарт үүнтэй ижил бодол эсвэл эргэлзээ төрж байсан бол өөрсдийгөө хэвийн гэдэгт итгэлтэй байгаарай. Зүгээр л Аврагчид итгэлтэй байж, урагш дуулгавартайгаар үргэлжлүүлэн алхаарай. Тэгвэл та нар “буруудах нь үгүй” (С ба Г 80:3).

Ерөнхийлөгч Жозеф Ф.Смит “Сүмд тууштай итгэлтэй байхын тулд гайхамшиг, үзэгдэл болон гэмдгүүдэд найддаг Хожмын үеийн Гэгээнтнүүдийг надад үзүүл. Тэгвэл би тэдэнд Бурханы өмнө сайн биш байгаа, халтирхайтай зам дээр алхаж буй гишүүдийг үзүүлэх болно. Бид үнэн дээр тогтсон байх эсэх нь ер бусын гайхамшигтай илэрхийлэлтээр бус харин Бурханы зарлиг болон хуулиудад итгэлтэй, даруу дуулгавартай байснаар илчлэгддэг” (*Ерөнхий чуулган дээр хэлсэн үг*, 1900 оны 4-р сар, 40) гэж зөвлөсөн.

Бас нэгэн гэрэлтэй холбоотой нийтлэг туршлага нь илчлэлтийн “шат шатаар, дүрэм дүрмээр” ирэх хэв маягийн тухай үнэнд суралцахад бидэнд тусалдаг. Заримдаа үүлэрхэг, манантай өглөө нар манддаг. Бүрхэг үүлтэй нөхцөлд гэрлийг мэдрэх илүү хүндрэлтэй бөгөөд тэнгэрийн хаяанд нар мандах мөчийг нарийн тодорхойлох боломжгүй байдаг хэдий ч шинэ өдрийг таньж мэдэх, ажил хэргээ явуулах хангалттай гэрэл байж л байдаг.

Үүнтэй адил замаар бид олон удаа хэрхэн эсвэл хэзээ хүлээн авснаа мэдэхгүйгээр илчлэлтийг хүлээн авдаг. Сүмийн түүхэн дэх нэгэн чухал явдал энэ зарчмыг үзүүлдэг.

1829 оны хавар Оливер Каудери Нью-Йоркийн Палмирад сургуулийн багш ажилтай байлаа. Тэр Иосеф Смит болон Мормоны Номын орчуулгын ажлын тухай олж мэдэн, ихэд биширсэн Оливер залуу бошиглогчид өөрийн чадах тусламжийн талаар санал болгохыг хүссэн байдаг. Иймээс тэр Пенсильванийн Хармони хүртэл аялан ирж, Иосефын бичээч нь болсон тухай түүхэнд байдаг. Түүний ирэлт болон үзүүлсэн тусламж нь Мормоны Номыг гаргахад асар чухал үүрэг гүйцэтгэсэн юм.

Хожим нь Аврагч түүний заавар хүсч байнга залбирах бүрд Их Эзэний Сүнснээс удирдамж хүлээн авч байгааг Оливерт илчилжээ. Их Эзэн “Хэрэв энэ нь ийм байгаагүй аваас, чи энэ цагт өөрийнхөө байгаа тэр газарт хүрч ирэхгүй байх байсан. Болгоогтун, чи надаас асууснаа мэдэж байгаа мөн бибээр чиний оюуныг гэгээрүүлсэн билээ; мөн үнэний Сүнсээр гэгээрсэн гэдгээ чамайг мэдээсэй гэсэндээ би эдгээр зүйлүүдийг чамд хэлж байна” (С ба Г 6:14–15) гэж тунхаглажээ.

Ийнхүү, Оливер, Иосеф Смитээр дамжуулан тэр илчлэлтийг хүлээн авч байна гэсэн өөртөө мэдэгдсэн илчлэлтийг хүлээн авсан. Мэдээжийн хэрэг, Оливер Бурханаас хэрхэн, хэзээ удирдамжийг хүлээн авч байснаа мэдээгүй ба илчлэлтийн сүнсний тухай түүний ойлголтыг нэмэгдүүлэхийн тулд энэ заавар хэрэгтэй байлаа. Мөн чанартаа Оливер үүлэрхэг өглөө нар мандахтай адил гэрэлд алхаж байсан юм.

Бидний амьдралд эргэлзээтэй зүйл болон олон саад бэрхшээл тулгарах үед Бурхан биднийг өөрсдийн чадах бүхнээ хийж, өөрсдийн төлөө үйлдэх мөн өөрсөд дээрээ үйлдүүлэх нь үгүй болой (2Нифай 2:26) Түүнд найдахыг хүсдэг. Бид тэнгэр элчүүдийг харж, тэнгэрлэг дуу хоолойнуудыг сонсож, хязгааргүй их сүнслэг илэрхийлэлтүүдийг хүлээн авахгүй байж болно. Олон тохиолдолд бид Бурханы тааллын дагуу үйлдэж байгаа гэсэн бүрэн баталгаагүйгээр итгэн найдаж, залбиран урагш тэмүүлж болно. Гэвч өөрсдийн гэрээнүүддээ үнэнч байж, зарлигуудыг сахиж, байнга сайныг хийхийг эрэлхийлэн, илүү сайн хүн болохыг хичээх аваас бидний алхмыг Бурхан залан чиглүүлэх

болно гэсэн итгэлтэйгээр алхаж чадна. Мөн Бурхан бидний хэлэх үгсийг маань заан чиглүүлнэ гэсэн баталгаатайгаар ярьж чадна. Энэ нь “Тийнхүү итгэлтэй байдал чинь Бурханы оршихуйд хүчтэй болох болно” (С ба Г 121:45) хэмээн тунхагладаг судрын хэсэгтэй дүйцэх юм.

Та нар зохистойгоор илчлэлтийн сүнсийг эрэлхийлэн, ашиглах аваас “Их Эзэний гэрэлд алхацгаах” (Исаиа 2:5; 2 Нифай 12:5) болно гэдгийг би та нарт амлаж байна. Заримдаа илчлэлтийн сүнс шууд, ил тодоор, зарим үед нарийн учир утгатайгаар, алгуурхан ажиллах болно. Ихэвчлэн түүнийг таньж мэддэггүй. Тэр бүү хэл мэдэрдэггүй. Гэвч энэ адислал хүлээн авагдсан загварын ачаар гэрэл та нарын бодгалыг гэрэлтүүлэн, өсгөж, ойлголтыг тань гэгээрүүлэн, (Алма 5:7; 32:28-г үз) та нарыг болон гэр бүлийн тань замыг заан, хамгаалах болно.

Эцэг, Хүү хоёр амьд гэсэн Бурханы төлөөлөгчийн гэрчлэлээ би тунхаглаж байна. Илчлэлтийн сүнс үнэн бодитой бөгөөд хувь хүн бүрийн амьдралд болон Есүс Христийн Хожмын Үеийн Гэгээнтнүүдийн Сүмд үйл ажиллагаагаа явуулж чаддаг бөгөөд явуулсаар байгаа билээ. Эдгээр үнэнийг би Их Эзэн Есүс Христийн ариун нэрээр гэрчилж байна, амен.

Лиахона

2011 оны 5-р сар